

Siunnersuut uunga Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat nr. xx, uu. qqqq 199y-imeersoq

Kapitali 1.

Siunertaa atuuffissaalu il.il.

§ 1. Inatsisikkut siunertarineqarpoq Kalaallit Nunaanni qimmit qitsuillu peqqissuunissaasa qularnaarneqarnissaat, kalaallit qimmiat qimuttoq allanik akuneqatsaaliussallugu kiisalu inuit, uumasut avatangiisillu qimmit qitsuillu ajoqusiisinnaanerinut illersussallugit.

§ 2. Inatsimmi pineqarput qimmiutit qitsuutillu suulluunniit, taakku inuussutissarsiutaagaluarpata inuussutissarsiutaanngikkaluarpataluunniit apeqqutaatinnagu.

§ 3. Inatsimmi matumani qimminik qimuttoqarfiusutut paasineqassapput Sisimiut Kommunianniit, Kangerlussuarmit avannamut Qaanaaq ilanngullugu, Nuna Eqqissisimatitaaq kiisalu Ittoqqortoormiit Ammassaliullu kommuni.
Imm. 2. Nunat erseqqinnerusumik taaneqartut, qimminik qimuttoqarfiusunut killeqarfillit, qimminik qimuttoqarfiusutut naatsorsuunneqarsinnaanerinik Naalackersuisut aalajangersaasinnaapput.

Kapitali 2.

Oqartussaasut

§ 4. Piumasaqaatit §-ini 8, 12, 22 aamma 23-imi aalajangersarneqartut taakkuluunniit naapertorlugit malittarisassat aalajangersarneqartut malinneqarnissaat qularnaarniarlugu peqqussutit inerteqqutillu pisariaqartutut isigineqartut Naalackersuinit nalunaarutigineqassapput.

Imm. 2. Naalackersuisut pisinnaatitaaffitik tamaasa taakkuluunniit ilaat kommunalbestyrelsimit isumagisassanngortissinnaavaat.

§ 5. Piumasaqaatit §-ini 7, 9, 10-mi, aamma 13, imm. 1-mi, kiisalu 15, 16, aamma 19-imi aalajangersarneqartut taakkuluunniit naapertorlugit malittarisassat aalajangersarneqartut malinneqarnissaat qularnaarniarlugu peqqussutit inerteqqutillu pisariaqartutut isigineqartut kommunalbestyrelsinit nalunaarutigineqassapput.

§ 6. §-it 4 aamma 5 naapertorlugit nakkutilliisutut oqartussaasut inuillu taama immikkut piginnaatitaasut kinaassutsiminnik uppersaateqarlutik eqqartuussivimmillu piginnaatitsissuteqaratik qaqugukkulluuniit pisortat namminersortullu illuutaannik, iniutaannik, angallataannik allagaataanillu takusaasinnaapput paasissutissanik inatsit, inatsilluuniit naapertorlugu malittarisassiat tunngavigalugit aalajangiinissanut atugassanik pissarsiniarlutik.
Imm. 2. Pisariaqarnera naapertorlugu politiit taamaaliortoqarnerani ikiuussinnaapput. Naalackersuisut inatsisinik atortitsinermut ministerimut isumaqatiginninniareernerimmikkut tamanna pillugu erseqqinnerusunik malittarisassiorsinnaapput.

Kapitali 3. *Qimmit qitsuutillu*

§ 7. Sumiiffiit avatangiisinut peqqinnangitsut imaluunniit nersutaatinut uninngatitsivigissallugit naleqqutinngitsutut isigineqartariaqartut qimmeqarfiginissaat qitsuuteqarfiginissaallu, katersortitsiviginissaalluuniit inerteqqutaavoq.

Imm. 2. Sumiiffiit qimmit qitsuullu katersorneqarfigisartagaat pillugit maleruagassanik immikkut ittunik Naalackersuisut aalajangersaasinnaapput.

§ 8. Naalackersuisut aatsaat akuersissuteqareernerisigut nersutaatinut sungiusaavinnik, angerlarsimasitsisarfinnik, napparsimmavinnik, paaqqinnittarfinnik assigisaannillu pilersitsisoqarluni ingerlatsisoqarsinnaavoq.

Imm. 2. Tamakku pillugit Naalackersuisut immikkut maleruagassanik aalajangersaasinnaapput.

§ 9. Qimmit arfinilinnik qaammateqalereersimasut kalunnernik pitussimassapput, mattusimaneqarlutik, ungaluukkani mattusimaneqarlutik imaluunniit pituutaqartinneqassallutik.

Imm. 2. Imm. 1-imi aalajangersakkanut ilaatinneqanngillat savaatillit qimmii, qimmit sulisitat naalackersugaasut kiisalu qimmit illoqarfiup avataani aallaaniarnermut suliffiulluunniit avataatigut sammisaqarnernut atorneqartut aamma naalackersugaasut, kiisalu qimmit qeqertani qimmilivinni akuerisaniittut.

Imm. 3. Qimmit pitussimanngitsut toqunneqarsinnaapput piginnittumut taarsiinissamut akisussaaffittaqaanngitsumik. Tamannali atuutinngilaq imm. 2 naapertorlugu qimminut pitussimasussaataanngitsunut.

§ 10. Kiisortunik qimmeqarnissaq inerteqqutaavoq.

Imm. 2. Qimmit inunnik saassussimasut imaluunniit nersutininik allanik toqutsisimasut piaartumik toqunneqassapput.

Imm. 3. Qimmit tuloriaajarneqartarneri pillugit Naalackersuisut malittarisassiorsinnaapput.

§ 11. Qimmiutilik qimmiummi ajoqusigaannut taarsiisussaataavoq.
Imm. 2. Qimmit akisussaanerinit sillimasiisarneq pillugu Naalakkersuisut malittarisassiorsinnaapput.

§ 12. Kalaallit Nunaannut imaluunniit sumiiffinnut erseqqinnerusumik taaneqartunut qimminik naggueqatigiinnik aalajangersimasunik aamma qimminik ulorianaateqarsinnaasunik, ersiortitsisinnaasunik imaluunniit paarilluarneqarsinnaanngitsunik pigisaqaqqusinnginnermik Naalakkersuisut maleruagassanik aalajangersaasinnaapput.

Kapitali 4.

Qimmit qitsuillu pillugit ileqqoreqqusat

§ 13. Kommunalbestyrelsi kommunimut qimmit qitsuillu pillugit ileqqoreqqusalussaaq.

Imm. 2. Ileqqoreqqusat tamakku imarisassaannut Naalakkersuisut erseqqinnerusunik maleruagassanik aalajangersaassapput.

Imm. 3. Imm. 1-imi ileqqoreqqusat taaneqartut atuutilersinneqartinnagit Naalakkersuisunit akuersissutigineqassapput.

Kapitali 5.

Qimmit qitsuillu paarineqarnerat

§ 14. Qimmit qitsuillu isumannaatsumik pineqassapput anniaatinut, naalliuutinut, ersinermut ataavartumik ajoqutinut annertuumillu ajoqutissanut sapinngisamik pitsaanerpaamik illersorneqassallutik.

§ 15. Kialluunniit qimmeqarlunilu qitsuuteqartup taakku peqqissaartumik paarineqarnissaat, taamatuttaaq nerukkarneqartarnissaat isumagissavaa, kiisalu imertinneqartarnissaat aamma timimikkut, pissusilersornermikkut peqqinnissamikkullu pisariaqartitaat eqqarsaatigalugit periaatsit akuerisaasut aamma ilisimatuussutsikkut misilittakkat naapertorlugit paarineqarnissaat.

Imm. 2. Qimmit qitsuillu panertumik nallavissaqartinneqassapput.

Imm. 3. Kialluunniit qimmeqarlunilu qitsuuteqartup taakku ikinnerpaamik ullormut ataasiarlugit takusarneqartarnissaat isumagissavaa.

Imm. 4. Qitsuit mattusimajuaannarlugit paarineqassanngillat.

Imm. 5. Meeqqat 16 inorlugit ukiullit taamaallaat nersutaateqarsinnaapput angajoqqaatik paarsisutilluunniit nakkutilliisoralugit akisussaasoralugillu.

§ 16. Qimmit uumatillugit piniariartarfinnut aallaaniartarfinnulluunniit, qimussimik sukkaniuffinnut imaluunniit qimussimik angalanerni qimaannarneqarnissaat inerteqqutaavoq.

Imm. 2. Qimmit qitsuillu uumatillugit nuunnermi aallarnermiluunniit naammattumik nakkutilliisoqartinnagit qimaannarneqarnissaat inerteqqutaavoq.

§ 17. Qimmiminik qitsuutiminilluuniit toqutsiniartup sapinngisamik sukkasuumik anniartitsinertaqanngitsumillu toqunneqarnissaat qularnaassavaa.

Imm. 2. Imaani imermiluunniit ipititsinikkut, qimitsinikkut nivinngaanikkulluunniit toqutsineq inerteqqutaavoq.

Imm. 3. Naalackersuisut qimmilik qitsunnillu toqutsineq pillugu malittarisassiorsinnaapput.

§ 18. Pilataanissaq utaqqissunneqarsinnaanngippat, kiisalu pilataanerit annernarpallaanngitsut qaangiukkasuartussallu eqqaasanngikkaani, uumasut nakorsaat kisimi pilattaasinnaatitaavoq.

Imm. 2. Uumasup isikkua allanngortinniarlugu pilattaasoqassanngilaq.

Imm. 3. Pamiut siutilluunniit nuuinik kipisineq inerteqqutaavoq, nappaatit pissutigalugit uumasut nakorsaat taamaaliunngippat.

Imm. 4. Atortulersorluni allatulluunniit iliorluni qimmit erlippaannik ajoqusiinissaq inerteqqutaavoq.

Imm. 5. Qitsuit kukiinik pilataanikkut allatulluunniit iliorluni peersinissaq inerteqqutaavoq.

Kapitali 6.

Kalaallit qimmiisa qimuttut akuneqatsaaliorneqarneri

§ 19. Qimuttoqarfiusut kalaallit qimmerinngisaannik qimmeqarfigeqqusaanngillat.

Imm. 2. Qimminik qimuttoqarfiusunut qimminik eqqussinissaq sunaluuniit inerteqqutaavoq.

Imm. 3. Imm. 2-mi aalajangersakkat apeqqutaatinnagit qimmit sulisinneqartartut qimmillu innarluutillit ikiortaat qinnuteqaateqartoqarneratigut Naalackersuisut akuersinnaavaat tamakkununngalu piumasaqaataasut aalajangersarsinnaallugit - taamatuttaaq qimmit taamaattut kinguaassiorsinnaajunnaarsinneqarnissaat pillugit piumasaqaateqarsinnaallutik.

Imm. 4. Qimmit qimuttut, qimminik qimuttoqarfiusunit anninneqarsimasut aatsaat Naalackersuisut immikkut akuersissuteqarnerisigut eqquteqqinneqarsinnaapput.

Imm. 5. Sumiiffinnut allanut kalaallit qimmiinik qimuttunik eqqussinissaq inerteqqutaavoq.

§ 20. Kalaallit qimmii anisuumik mannissanilluunniit nuutsivigineqassapput aatsaat Naalackersuisut immikkut akuersissuteqarnerisigut.

Kapitali 7.

Nakkutilliineq il.il.

§ 21. Naalackersuisut qimminik qitsunnillu nakkutilliilersitsisinnaapput, taamatuttaaq paasissutissanik katersisitsisinnaallutik nalunaarsuisitsisinnaallutillu, misissugassanik peersisitsisinnaallutik kiisalu tamatumunnga atatillugu nalunaaqutsersuisitsisinnaallutik nalunaarsuisitsisinnaallutillu.

Imm. 2. Nersutaatinik imm. 1-imik taaneqartunik piginnittut inatsit naapertorlugu misissuisoqarnerani misiligutissanillu tigusisoqarnerani allatulluuniit iliortoqarnerani pisariaqarnera naapertorlugu akilerneqaratik ikiuutissapput.

Kapitali 8.

Nersutaatit nioqutigineqartarnerat il.il.

§ 22. Inuit, ingerlatseqatigiiffiit, peqatigiiffiit il.il. inuussutissarsiutigalugu inuussutissarsiutigingalugu qimmeerniartut qitsuerniartullu tuniniaanerminnik oqartussaasunut nalunaarutiginninnissaat, kiisalu pisiannik tunisaminnillu nalunaarutiginninnissaat pillugu Naalakkersuisut malittarisassiorsinnaapput.

§ 23. Qimmit qitsuillu angallaneqarneri, aamma tamatuma uppersaatitaqartinneqarnissaa pillugu Naalakkersuisut malittarisassiorsinnaapput.

Kapitali 9.

Nakkutillineq uparuaanerlu

§ 24. Kialuuniit qimmeq qitsuilluuniit § 14 naapertorlugu eqqunngitsumik pineqarsoriguniuk tamanna uumasut nakorsaanut imaluuniit politiinut imaluuniit kommuneqadimut ingerlaannaq nalunaarutigissavaa.

Imm. 2. Uumasut nakorsaat, politiit kommuneqadiluuniit nalunaarut pillugu Avatangiisinut Pinngortitamullu Pisortaqaqfiup Uumasut Nappaataannut immikkoortortaanut ilisimatsissapput.

Imm. 3. Avatangiisinut Pinngortitamullu Pisortaqaqfiup Uumasut Nappaataannut immikkoortortataa politiit kommuneqadiluuniit eqqunngitsumik pinnittoqartut naatsorsuuteqartoqarsinnaanersoq pillugu nalunaaruteqassaaq.

§ 25. Qimmit qitsuilluuniit eqqunngitsumik pineqarpata akisussaasoq uumasup pineqarnera pillugu politimesterimit uparuarneqarsinnaavoq.

Imm. 2. Uumasup napparsimappat iluarsineqarsinnaanngitsumilluuniit ajoqusersimappat politimesteri uumasup toqunneqarnissaanik peqqusisnaavoq uumaannassaguni naalliuppallaassappat.

Imm. 3. Peqqussut allaganngorlugu nalunaarutigineqassaaq. Peqqussut nalunaarutigineqartinnagu politimesteri Avatangiisinut Pinngortitamullu Pisortaqaqfiup Uumasut Nappaataannut immikkoortortaqarfianit nalunaarummik pissarsissaaq. Uumasumullu akisussaasoq oqaaseqarnissaminik periarfissinneqassaaq.

Imm. 4. Uumasup naalliukkunnaarsinneqarnissaa pissutigalugu imaluuniit akisussaasoq aallarsimasutut naatsorsuutigineqarpat pisariaqarnera naapertorlugu imm. 3 atortinnginneqarsinnaavoq.

Imm. 5. Imm. 2 naapertorlugu toqutsineq uumasup piginnittuanut taarsiinertaqanngitsumik pissaaq.

§ 26. § 25 naapertorlugu peqqussut malinneqanngippat uumasooq politimesterimit toqutsinneqarsinnaavoq inuttaanut taarsiinertaqanngitsumik.

§ 27. § 25 naapertorlugu peqquneqartoq, aamma uumasumik § 26 naapertorlugu toqunneqartumik piginnittoq suliamik eqqartuussivimmuut suliaassanngortitsisinnaapput. Aalajangiinerup pineqartumut nalunaarutigineqarneranit ullut 14-it qaangiutsinnagit tamanna pillugu qinnuteqaat politimesterimut saqqummiunneqassaaq. Eqqartuussivinnut tunniussineq kinguoorumut sunniuteqarnaviangilaq.

Kapitali 10.

Pineqaatissiisarneq pillugu aalajangersakkat

§ 28. § 7, imm. 1-imi, § 8, imm. 1-imi, § 9, imm. 1-imi 2-milu, § 10, imm. 1 aamma 2-mi, §-ini 14-imiit 18-imi, § 19, imm. 1, 2, 4, aamma 5-imi, § 20-imi kiisalu § 21, imm. 2-mi aalajangersakkanik unioqutitsisoqartillugu akiliisussanngortitsisoqarsinnaavoq.

Imm. 2. § 7, imm. 2-mi, § 8, imm. 2-mi, § 10, imm. 3-imi, § 11, imm. 2-mi, § 12-mi, § 13, imm. 1-mi, § 19, imm. 3-mi, kiisalu §-ini 22 aamma 23-imi aalajangersakkanik unioqutitsisoqartillugu akiliisitsisoqarnissaanik aalajangersaasoqarsinnaavoq.

Imm. 3. § 10, imm. 1-imi kiisalu §-ini 14-imiit 18-imi aalajangersakkanik sorraatsumik imaluunniit nangeqqittumik unioqutitsisoqartillugu sukkulluunniit nersutaateqarnissamut imaluunniit nersutaatinik suliaqarnissamut inerteqqummik pineqaatissiisoqassaaq.

Imm. 4. § 13-mi imm. 1 malillugu aalajangersakkanik sorraatsumik imaluunniit nangeqqittumik unioqutitsisoqartillugu sukkulluunniit nersutaateqarnissamut imaluunniit nersutaatinik suliaqarnissamut inerteqqummik pineqaatissiisoqassaaq.

Imm. 5. Imm. 3 aamma 4 naapertorlugit nersutaateqarnissamut imaluunniit nersutaatinik suliaqarnissamut inerteqqummik pineqaatissiineq qaqugumulluunniit atuuttussanngorlugu imaluunniit sivikinnerpaamik ukiumik ataatsimik sivilissusilerlugu pisinnaavoq.

Kapitali 11.

Atuutilerfia il.il.

§ 29. Inatsisartut inatsisaat 1. januar 1999 atuutilerpoq qimmit uumasullu illersorneqarnerat pillugu Kalaallit Nunaannut inatsimmik Folketingip akuersissutiginninnissaa naatsorsuutigalugu.

Imm. 2. 1. januar 1999-ip kingorna aatsaat Folketingip akuersissutiginnissappat inatsisartut inatsisaat ullormi Folketingip akuersissutiginniffiani atuutilissaaq.

Imm. 3. Tamatuma peqatigisaanik qimmiuteqarneq pillugu Landsrådit ileqqoreqqusaat 22. juni 1957-imeersoq, landsrådit ileqqoreqqusaatigut 4. marts 1959-imeersukkut allanngortinneqartoq atorunnaarsinneqarpoq. Taamaattorli §-ini 6 aamma 7-imi tuloriaajaasarneq pillugu aalajangersakkat atuutiinnassapput

Naalackersuisut inatsimmi uani § 10, imm. 3 naapertorlugu malittarisassiornissaasa tungaanut.

Imm. 4. Kommunit qimmit pillugit ileqqoreqqusaat atuutiinnassapput kapitali 4 naapertorlugu qimmit qitsuillu pillugit ileqqoreqqusalianit nutaanit taarserneqarnissamik tungaannut , kingusinnerpaamillu 31. december 1999.

Namminersornerullutik Oqartussat, ulloq uu. qqqq 199y

Jonathan Motzfeldt

/

Marianne Jensen